

# DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

---

Pablo dxugape' diuzre bi bíchedxu zaj zre'e xezre Colosas

**1** <sup>1</sup>Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'. <sup>2</sup>Dxuzúaja' da nigá chee le'e zrale xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios gunę' da chawe' chee le'e, ne gunne' le'e xel-la dxebeza zri lazre'.

Da dxenaba Pablo lau Dios chee bi bíchedxu ca'

<sup>3</sup>Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajlentu' Le'. <sup>4</sup>Ba bémentu' ca dxeajlí lázrele Cristo, ne ca nazrí'ile xúgute bi ca' chee Dios. <sup>5</sup>Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li. <sup>6</sup>Dizra' chawe' nigá bla na ládujla le'e ca bla na dute xezr la xu nigá, na' dxezriluj na, ne dxun na zrin dute xezr la xu ca dxun na ládujla le'e, gate béntele ca nazrí'i Dios bénneache, ne gunézele naca na da li. <sup>7</sup>Da nigá ble'e Epafras le'e. Naque' bi bíchedxu nazrí'i lázredxu, ne ba bénqueze' zrin nen netu', ne naque' chee le'e tu benne' wen zrin li lazre' chee Cristo. <sup>8</sup>Epafras nigá bzenne' netu' ca dxaca chee le'e, ne ca nazrí'i ljwézrele ne chee Be' Lá'azxa.

<sup>9</sup>Chee le na', zra gunézentu' da nigá, dxuchálajlequezentu' Dios chee le'e, ne dxenábantu' Le' guzéajni'ine' le'e ca naca da dxaca lazre', ne gunne' le'e dute xel-la sina, ne dute xel-

la dxéajni'i da dxunna Be' Lá'azxa dxi'u. <sup>10</sup>Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dzezaca ba lazre' Le', gunle xúgute da naca da xrlátaje, ne gúnbeadxaquezle Dios. <sup>11</sup>Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute da dxaca chee lu duté xel-la zren lazre' chee, ne duté xel-la dxebe. <sup>12</sup>Dxal-la' xe Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxaní' chee', lawe' da nácadxu bi chee Le'. <sup>13</sup>Dios bselé' dxi'u lu xel-la dxenná bea chee da chul-la, na' bzué' dxi'u naga dxenná bea Zrí'ine' nazri'ite lazre'. <sup>14</sup>Zrí'ine' nácaqueze' Bénnea' bselé' dxi'u gate gutie' waláz cheedxu, chee bnite lau Dios dul-la gubágadxu.

### Bexácadxu tuze nen Dios lawe' da gute Cristo

<sup>15</sup>Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácadxabe' blau ca xúgute da ben Dios. <sup>16</sup>Ne chee Le' ben Dios xúgute da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute na ben Dios ne chee Le', na' chee Le' zaj naca na. <sup>17</sup>Cristo ba zúaqueze' nédxute ca xúgute da zaj zua, na' ne chee Le' xúgute da ca' dxelún na ca zaj naca chee na. <sup>18</sup>Xúgute benne' zaj naque' bi chee Cristo zaj naque' ca tuze bel-la' dxen, na' Crístoqueze naque' xichaj bel-la' dxen na' da nácadxu. Le' bzué' bel-la' dxen na', ne Le' naque' Benne' bebán nédxute ládujla benne' gate ca' chee gaque' Benne' blau lu xúgute da zaj zua. <sup>19</sup>Caní naca na lawe' da guca lazre' Dios súale Cristo duté da nácaqueze Dios. <sup>20</sup>Cá'anqueze guca lazre' Dios ne chee Cristo xexune' tuze nen Le' xúgute da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

<sup>21</sup>Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute da calela, san na'a Dios ba bexune' le'e tuze nen Le', <sup>22</sup>ne chee da ben Cristo gate gutie' le'e xaga béguaj lu bela' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da calela. <sup>23</sup>Chee gaca caní dxal-

la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápa<sub>le</sub> lawe' da dxéajlele dizra' chawe' chee Cristo. Dizra' chawe' nigá nene na dutē xezr la xu, na' nuzúa Dios neda', Pablo, benne' wēn zrin chee', chee guchálaja' dizra' chawe' nigá.

### Zrin dxun Pablo chee bi ca' chee Cristo

<sup>24</sup>Na'a dxebeda' lu xel-la zi' da dxedéa' ne chee<sub>le</sub> le'e, lawe' da dxuzá lawa' lu bēl-la' dxen chia' ca da dxezaca Cristo ne chee bi chee' ca', benne' ca' zaj naque' ca bēl-la' dxen cheéqueze'. <sup>25</sup>Bzua Cristo neda' ca benne' wēn zrin chee bi chee' ca', ne chee da bláwizra Dios neda' guna', gácala<sub>na</sub>' le'e, na' guchálaja' dūtequeze da naca dizra' chee Dios, <sup>26</sup>ne chee guzéajni'ida' bēneache ca da nagache, da na' nagache nédxute, san na'a Dios ba blé'ene' bi chee' ca' ca naca na. <sup>27</sup>Guca lazre' Dios gulé'ene' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache nédxute naca na caní: Cristo zue' xichaj lázrdaule, na' chee le na' dxebeza lázredxu súadxu xabáa chee'.

<sup>28</sup>Netu' dxuchálajntu' ca naca chee Cristo. Dxuzéajni'intu' xúgute bēneache, ne dxusédentu' xúgute', chee xeleajni'i xánnene' chee xelaca xúgute bēneache du lazre' lau Dios ne chee Jesucristo. <sup>29</sup>Chee gaca caní dxuna' neda' zrin, dxuchíneda' dutē xel-la waca chee Cristo, da dxun na zrin lu xichaj lázrdawa'.

**2** <sup>1</sup>Dxaca lazra' nézele le'e dxúnle'a zrin, dxe'a gunne xue len Dios da naca chee<sub>le</sub> le'e, ne da naca chee bi bíchedxu ca' ca' zaj zre'e Laodicea, ne da naca chee xúgute bi bíchedxu ca' quebe ne xeelé'ene' neda' caníqueze. <sup>2</sup>Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunní'a lu xichaj lázrdawe', chee xelúnbe'e da nagache chee Xradxu Dios da nácaqueze Cristo. <sup>3</sup>Lu na' Le' zaj de ca naca xel-la gunní'a chee xel-la sina, ne xel-la dxéajni'i. <sup>4</sup>Dxapa' le'e da nigá chee quebe xelezí xē le'e benne' ca' zaj neze xrgúe' ca dxuluchálaje'. <sup>5</sup>Lácala quebe zúaletea' le'e caníqueze, naca na cáteze zúalēna' le'e lu be' nácaqueza', na' dxebéle'eda' dxenda' dxunle da xlátaje, ne zē cháchale ca dxeajlí lázrele Cristo.

<sup>6</sup>Chee le na', ca bēnle, guzí' lu na'le Xránadxu Jesucristo, cá'anqueze dxal-la' gunle súalele Le'. <sup>7</sup>Dxal-la' gácale ca tu

xaga da dxudé lue na sítujla lu da naca chee Cristo. Cá'anqueze dxal-la' gácale ca tu xu'u da dxe' lane lu da naca chee' Le', chee se cháchale ca dxeajlí lázrele Le', ca blé'entu' le'e, na' dxál-la'queze xele Dios: Xcalenu'.

### Xel-la nabán cube da dxunna Cristo dxi'u

<sup>8</sup>Le guxúe cuínale. Quebe güele lataj xelezí xe benne' ca' le'e, xuluchínene' xel-la sina chee bénneache, ne dizra' calela, ca naca da dxulusédequeze bénneache, ne ca zaj naca da ca' dxácaqueze lu xezr la xu nigá, ne quegá ca naca chee Cristo.

<sup>9</sup>Dute ca naca Dios nácaqueze Cristo.

<sup>10</sup>Nápale le'e xúgute da naca chee'

lawe' da nácaquezele bel-la' dxen chee Le'.

Le' dxenná be'ene' xúgute be' da dxelenná bea na,

ne xúgute be' da zaj napa na xel-la waca.

<sup>11</sup>Cá'anqueze, lawe' da nácale tuze nen Cristo nácale bi chee Dios. Quebe guca chee ca da na' belúnqueze benne' judío ca', gulechugue' late' bel-la' dxen chee bi biu chee' ca', da na' dxulé'e na zaj nácabe' chee Dios. Bedúa dute da naca chee bela' dxen chee da naca sban, da guca na ne chee da ben Cristo lu xichaj lázrdaule. Bene' nácale bi chee Dios. <sup>12</sup>Gate gudxúale nisa guca chee ca guca chee Cristo gate bgache' lu xedxu ba, na' cá'anqueze guca chee ca guca chee Le' gate bebane' ládujla benne' gate. Caní guca chee lawe' da guxeajlí lázrele xel-la waca chee Dios, Bénnea' bsebane' Cristo ládujla benne' gate ca'. <sup>13</sup>Gate nate gúcale le'e ca benne' gate lu dul-la da gubágale, ne lu bela' dxen sban chee da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúgute dul-la da gubágale. <sup>14</sup>Dios bzria xi'e ca naca da nabágadxu chee xúgute da nadxixruj bea na da gula da buluzría xi na dxi'u. Bebéaje' na chalá'ala, ne bde'e na le'e xaga béguaj ca tu da gubaga' Cristo. <sup>15</sup>Gate gute Cristo le'e xaga béguaj begüe' ca naca xel-la dxenná bea, ne xel-la waca chee be' xriwe' ca', na' blé'ene' da ca' lówela gubáz chee xabáa ca' lawe' da gunná bé'ene' na.

### Le sa lazre' da ca' zaj de na xabáa

<sup>16</sup>Chee le na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní chee beu' dxe'ene, ne ca zaj naca zra dxupá'anale. <sup>17</sup>Xúgute da caní

zaj naca na ca tu zrúl-laze chee da zaj zéaje da ca'. <sup>18</sup>Quebe güele lataj nu cua da nucueza Dios chee le'e, ne chee da dxululé'e benne' ca', benne' dxeléquene' zaj naque' dxexruj lazre' lawe' da dxulucá'ana szrene' gubáz chee xabáa ca', ne dxuluchálaje' chee da quebe ne xeledé'ene', ne dxulucá'ana szren cuine' ca naca xel-la sina chee bénneacheze da zaj nape'. <sup>19</sup>Quebe zaj de'e Cristo, Bénnea' naque' xichaj bel-la' dxen da nácadxu dxi'u, na' Le' dxusegule' dute bel-la' dxen na', ne dxugawe' na, ne dxune' na tuze du ca naca na, chee gaca na ca dxaca lazre' Dios.

<sup>20</sup>Naca chee ca naca chee tu benne' ba nate lawe' da nácale bel-la' dxen chee Cristo, chee québedxa gunle ca zaj naca da ca' dxácaqueze lu xezr la xu nigá. Na'a, ¿bizr chee na' dxedale ca benne' ne zaj nácaqueze' chee xezr la xu nigá, ne dxunle ca da dxelenná bea bénneache. <sup>21</sup>Dxelenné': Quebe guchínenu' da nigá. Quebe gagu' da ca'. Quebe chajtáu' da na'. <sup>22</sup>Xúgute da nadxixruj bea caní dxuluchalaj na chee da ca' dxeledé chee na gate dxuchínedxu na, ne zaj nácaze na da dxelenná bea bénneache, ne da dxulusede bénneache. <sup>23</sup>Da li dxeleque bénneache zaj naca na sina da nadxixruj bea caní, lawe' da dxulusede na bénneache xelúe lá'ane' Dios, ne xelaque' dxexruj lazre', ne xelenná be'ene' bel-la' dxen chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

**3** <sup>1</sup>Le'e nácale ca benne' ba belexebán tu zren nen Cristo. Chee le na' le sa lazre' da zaj zua xabáa, naga dxe' Cristo chalá'a xabela chee Dios. <sup>2</sup>Le gulaba lazre' chee da zaj de xabáa, quegá chee da zaj de lu xezr la xu. <sup>3</sup>Nácale ca benne' ba zaj nate, na' xel-la nabán chee nuzúa chawe' Dios naga zua Cristo. <sup>4</sup>Cristo nácaqueze xel-la nabán cheedxu, na' gate xelá' Le', cá'anqueze le'e gunle tu zren Le' lu xel-la szren chee'.

### Xel-la nabán gula ne xel-la nabán cube

<sup>5</sup>Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da calēla ca', ne xel-la dxucude', lawe' da naca da dxucude bénneache ca dios cheequeze'. <sup>6</sup>Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba

xa'. <sup>7</sup>Cá'anqueze le'e benle xúgute da caní gate nate. <sup>8</sup>Na'a, québedxa gunle xúgute da caní:

Xel-la dxezrá'a, ne xel-la xichaj zra'a, ne xel-la dxequide ljwezre.

Québedxa nnele dizra' schanni'.

Québedxa gucháchale ljwézrele.

<sup>9</sup>Quebe si xē ljwézrele tule xetule, lawe' da ba bzúale chalá'ala da gúcale nédxute, ne ca naca da benle. <sup>10</sup>Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bene' le'e, ca zrindxa gúnbea xánnele Le'. <sup>11</sup>Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lárdaudxu.

<sup>12</sup>Dios nazri'ine' le'e, ne guqué'e le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',  
ne benne' dxexruj lazre', ne benne' chawe' lazre',  
ne benne' zren lazre'.

<sup>13</sup>Le gácale ljwézrele tule xetule,  
ne le gunite lau chee'le tule xetule,  
che núlale dxezrá'a ljwézrele.

Ca ben Cristo, bnite lawe' chee'le,  
cá'anqueze le gun le'e chee ljwézrele.

<sup>14</sup>Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. <sup>15</sup>Xel-la dxebeza zri lazre' da dxunna Dios dxi'u dxal-la' nna bea na lu xichaj lárdaudxu, lawe' da bláwizra Dios le'e chee súde lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xele Dios: Xcalenu'.

<sup>16</sup>Dizra' chee Cristo dxal-la' guzúa xánnele lu xichaj lárdaule chee séquele guzėjajni'ile, ne gusízre ljwézrele nen dutē xel-la sina chee Dios. Lu dutē xel-la dxezaca ba lazre' le gul-la lau Dios salmo ca', ne da dxue lánale Dios, ne da ca' dxuzúa Be' Lá'azxa xichaj lárdaule. <sup>17</sup>Bíteteze da gunle, u da nnale, le gun xúgute na lu La Xránadxu Jesús, ne xele Xradxu Dios: Xcalenu', ne chee Le'.

**Ca dxal-la' xelún benne' ca' zaj naque' bi chee Cristo**

<sup>18</sup>Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

<sup>19</sup>Le'e, benne' biu, le zri'i zrú'ulale, ne quebe xexitaj lázrele le'.

<sup>20</sup>Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

<sup>21</sup>Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

<sup>22</sup>Le'e, benne' zaj nada'u, le guzúa dizra' xúgute da xelenná xránale lu xezr la xu nigá, quegaze gate dxelenná'tee', chee xeléquene' le'e xrlátaje, san le gun da ca' du lázrele, ne le zrebe Dios. <sup>23</sup>Bíteteze da gunle, le gun na du lázrele, ca nu benne' dxune' zrin chee Xránadxu, ne quegá zrin chee beniácheze. <sup>24</sup>Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaquezé' Xránale. <sup>25</sup>Nu benne' dxune' da calela, wazi'e lazruj chee da calela nune' lawe' da quebe dxuchá Dios ca da dxune' chee tu xetú benne'.

**4** <sup>1</sup>Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'aqueze le'e, zua Xránale xabáa.

<sup>2</sup>Le'e, bi bícha'dau', le guchálajlequeze Dios, súale ban lazre', ne xeje Dios: Xcalenu'. <sup>3</sup>Cá'aqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzéajni'intu' bénneache ca naca da nagache ca naca chee Cristo. Lawe' da dxuna' da caní ne xu'a lizre xia nigá. <sup>4</sup>Le naba lau Dios chee séqueda' guzéajni'i xánneda' bénneache ca dxal-la' guna'.

<sup>5</sup>Le gaca sina ca dxunle chee benne' ca' quebe dxeajlí lazre' Cristo, guchine xánnele zra ca' dxunna Dios le'e. <sup>6</sup>Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

**Dxulugapa diuzre bi bíchedxu ca' ljwezre'**

<sup>7</sup>Tíquico, bi bíchedxu nazrí'i lázredxu guzenbe' le'e ca naca da dxaca chia'. Nácabe' tu bi li lazre' dxácalenbe' neda', ne

dxunbe' zrin chee Xránadxu tu zren nen neda'. <sup>8</sup>Chee le na', dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. <sup>9</sup>Cá'anqueze zéajle Onésimo lebe', naque' bíchedxu li lazre', benne' nazrí'i lázredxu, ne naque' benne' waláZR cheele. Benne' caní xuluzenne' le'e ca naca da dxaca nigá.

<sup>10</sup>Aristarco, benne' xú'ulene' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzéajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'. <sup>11</sup>Cá'anqueze bénnea' le' Jesús dxugape' le'e diuzre, bénnea' léqueze' Justo. Benne' zan benne' judío dxelejli lazre' Cristo, san benne' canize ládujla benne' judío ca' dxelune' zrin tu zren nen neda', na' dxuzéentu' bénneache ca xelezéquene' xelu'e naga dxenná bea Dios, na' dxuluzúe' neda' tu lu da ba neza zrente'.

<sup>12</sup>Dxugapa Epafras le'e diuzre. Naque' wen zrin chee Cristo, ne benne' waláZR cheequezle. Dxenábaqueze' lau Dios cheele le'e chee se cháchale, ne guzúa cuínale du lázrele chee gunle da dxaca lazre' Dios. <sup>13</sup>Neda' dxexecheba' chee Epafras, dxe'e gunne xue cheele le'e, ne chee bi bíchedxu zaj zre'e xezre Laodicea, ne xezre Hierápolis. <sup>14</sup>Dxugapa le'e diuzre Lucas, bénnea' dxexune' benne' we' ca', ne naque' benne' nazrí'i lazra'. Cá'anqueze dxugapa Demas le'e diuzre.

<sup>15</sup>Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'. <sup>16</sup>Ca te gulábale le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea. <sup>17</sup>Le xe Arquipo da nigá: Bxue xanne' gunu' cháwe'dau' ca naca zrin chee Xránadxu da bzue' lu na'u.

<sup>18</sup>Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gune' cheele da chawe'. ¡Ca'an gaca na!